

ጳውሎስ ተሴሎንቄ አሳሰ ፃፊዳ ኮይር ኪታ ጋሳ ቆፋ

ተሴሎንቄይ፡ ርሜ ቢታን ዳዒያ ማቄደኒያ አወራጃስ ዋና ካታማ። ጳውሎስ ፊልጲሲዩሳ ዩዲዲ ቢዳፔ ጉዬ ተሴሎንቄን ዋሳ ኩላ ኤሲስ። ገደሺን፡ አይሁዳታ አማኑዋ ኤካናው ጊጌቲዲ ኡቲዳ አይሁዳ ገደና አሳይ፡ ጳውሎስ ታማርሲያ፡ ኪሪስቲና አማኖ ቲሚርቲያን ያኔቲዳ ጊሾ አይሁዳቲ ቃናቲዲ፡ ጳውሎሳ ቲሚርቲያ ጳልቂዶሶና። ሄሳ ጊሾ፡ ጳውሎስ ጋምዖናሺን ተሴሎንቄ ዩዲዲ፡ ቤሪያ ቢስ (1:9-10)። ጉዬፔ ኢ ተሴሎንቄ ጋኪዳ ዋዴ ኢያ ማዲያ ሂሞቲዮሲ ተሴሎንቄ ዋሳ ኩላን ዳዒያ ሃኖታ ኢያው ጌሺዲ ኦዲስ።

ጳውሎስ ኮይር ኪታ ተሴሎንቄ አሳሰ ፃፊዳይ፡ አማኒያ አሳ ዘራናሳኔ ሚንሴላናሳ። ኢ ኤንታ አማኑዋኔ ኤንታ ሲቁዋ ሎዖ ማርካቴላ ሲዲዳ ዋዴ ያሳ ጋላቲስ። ካሴ ኢ ኤንታ ጊደን ዳዒዳ ዋዴ አይ ሜላ ዱሱ ዳዒዳኮ ኤንታ ሃሳይሴስ። ሄሳፊ ኪሪስቲሳ ናምዓንሉ ዩሳባ ኦይሾቲዳ ኦይሻስ ዛሮ ኢሜስ። ሄ ኦይሻታፔ ጉላቲ፡ «ኪሪስቲሳ ናምዓንሉ ያናፔ ሲንሴ ሃይቂዳ አማኒያ አሲ ኪሪስቲሳ ዩሳይ ኢሚያ ሜሪና ዴዖ ኤካናው ዳንዳዒ? ኪሪስቲሳ ናምዓንሉ ያናይ አዉዴ?» ጌቲቲይሳታ። ጳውሎስ ሄ ኢንጄ ዋዲያ ጎዒቲዲ፡ «ኪሪስቲሳ ናምዓንሉ ዩሳ ኡፋይሳን ናጊሼ ኢ ያና ጋካናው ዋፑ ጊዲ ሂንቲ ኦሶ ኦሊቲ» ያጊዲ ዘሪስ።

1 ተሴሎንቄ ኪታ አይፊ ቆፋታ

- ጌሎ ቆፋ 1:1
- ጳውሎሳ ኡፋይሳኔ ጋላታ 1:2-3:13
- አማኒያ አሳ ዴዖ ካሌሱዋ 4:1-12
- ኪሪስቲሳ ናምዓንሉ ዩሳባ 4:13-5:11
- ዉርሴላ ዘሬ 5:12-22
- ኩሻ ቆፋ 5:23-28

1 ጳውሎስ ሲላሴይኔ ሂሞቲዮሲ ተሴሎንቄ ዋሳ ኩላን ዳዒያ፡ ያሳ አዋባኔ ጎዳ ዩሱስ ኪሪስቲሳባ ጊዲዳ አሳሰ ፃፊዳ ኪታ። ኦይ ኬሃቲላይኔ ሳርይ ሂንቲው ጊደ።

ቴሴሎንቄ አሳ ዳዑዋን አማኑዋ

2 ኑኒ ያሳ ዋሲያ ዋዴ ኡባን ሂንቴና ቆፒሼ ሂንቴ ጊሾ ኡባ ዋዴ ያሳ ጋላቶስ። 3 ያሳ ኑ አዋ ሲንፋን አማኖን ሂንቴ አሊዳ ኑሱዋ፣ ሲቆን ሂንቴ ዳቡሪዳ ዳቡሪኔ ዬሱስ ኪሪሰቶሳን ዴዒያ ኡፋይሳ ኤካናው ሂንቴ ሚኒዲ ኤቁዳ ኤቁዋ ኡባ ዋዴ ቆፖስ።

4 ኑ አሻቶ፣ ያሳይ ሂንቴና ደሴይሳኔ ባ አሴ አሊዲ ሂንቴና ዳሪዳይሳ ኤሮስ። 5 አይስ ጊኮ፣ ኑኒ ዋንጌላ ዶና ያላላን ጊዶናሽን ዋልቃን፣ ጌሻ አያናኒኔ ዋንጌላ ቱማ አማኖን ሂንቴው አሂዳ። ኑኒ ሂንቴራ ጋምዒዳ ዋዴ ኡባን ሂንቴ ጊሾ ዋኒዲ ዴዒዳኮ ሂንቴ ኤሬታ። 6 ሂንቴ ዳሮ ሜቶ ኤኪኮካ ጌሻ አያናይ አሚያ ኡፋይሳን ኪታ ኤኪዴታ፤ ኑናኔ ጎዳ ዳኒዴታ። 7 ሄሳ ጊሾ፣ ማቁደኒያኔ አካያ ቢታን ዴዒያ አማኒያ ኡባስ ለሚሶ ጊዲዴታ። 8 ጎዳ ቃላይ ሂንቴፊ ኬዩዲ፣ ማቁደኒያኒኔ አካያ ያላላን ጊዶናሽን ያሳ ሂንቴ አማኔይሲ ኡባሶን ሲዔቲስ። ሂዛ፣ ኑኒ ጋናባይ አይኮይካ ባዋ። 9 ኑኒ ሂንቴኮ ቢዳ ዋዴ ሂንቴ ኑና ዋኪዳ ዋኩዋኔ ሂንቴ፣ ሂንቴ ኤቃ አኒዲ ቱማኔ ዴያ ያሳ ሃጋዛው ሂንቴ ሲሚዳይሳ ኤንቲ ባንታ ሁዒን አዶሶና። 10 ቃሲ ያሳ ናዒይ፣ ዬሱሲ፣ ያሳይ ሃይቆፔ ዴንሲዳይሲ፣ ሲንፋፊ ያና ያሳ ሃንቁዋፊ ኑና አሻናይሲ፣ ሳሎፔ ያናይሳ ሂንቴ ናጌይሳ ኤንቲ ማርካቶሶና።

2

ጳውሎሲ ቴሴሎንቄን አሊዳ አሱዋ

1 ታ አሻቶ፣ ኑኒ ሂንቴኮ ቢዳይ ሚላ ጊዶናይሳ ሂንቴ፣ ሂንቴ ሁዒን ኤሬታ። 2 ሺን ኑኒ ሂንቴኮ ቴሴሎንቄ ያናፔ ሲንፋ ፊልጲሲዩሳ ካታማን ዋዬቲዳይሳኔ ጫዬቲዳይሳ ሂንቴ ኤሬታ። ዳሮ አይይ ዴዒኮካ ሂንቴው አያ ዋንጌላ ኦዶና ሚላ ያሳይ ኑስ ሚናቴሊ አሚስ። 3 ኑኒ ሂንቴና ዘሪዳይ ባሌሶን ዋይኮ ጨሞን ዋይኮ ጌኔን ጊዴና።

4 ሺን ያሳይ ኑናን አማኔቲዲ ባ ዋንጌላ ኦዶና ሚላ ኑስ ሃዳራ አሚዳ ጊሾ ኦዶስ። ኑ ሄሳ አሌይ ኑ ዋዛና ቤዒያ ያሳ ኡፋይሳናሳፊ አቲን አሴ ኡፋይሳናሳ ጊዴና። 5 ኑ ሚሾ ያሪዲ ዋርዶ ሂንቴና ሳቢሾ ሂንቴኮ ዮናይሳ ሎይሊዲ ኤሬታ፤ ያሳይ ኑስ ማርካ። 6 ኑኒ ሂንቴፊ ጊዲን ዋይኮ ሃራ አሳ ኦዴፊካ ቦንቾ ኮዩቦኮ። 7 ኑኒ ኪሪሰቶሳ ሃዋሬ ጊዴይሳዳ ኑስ ኮሺያባ አሚቴ ጊዲ ኤካናው

1:6 ሃ.ኦ 17:5-9 2:2 ሃ.ኦ 16:19-24፤ 17:1-9

ዲንዳዎስ፡ ሺን አያ ባ ናይታ ዲቹይሳ ሜላ ሂንቴ ገደን አሽኬ ገዲዲ። 8 ኑ ሂንቴና ደሲዳ ገሾ ያሳ ዋንጌላ ሂንቴው ሻኮ ዓላላ ገደናሺን ኑ ዴቡዋካ ሂንቴው አማናው ገገዳ። ሂንቴ ኑስ ዳር አልዶ። 9 ኑ አሻቶ፡ ኑ ኡሱዋኔ ኑ ዳቡራ ኤሬታ። ሂንቴው ያሳ ዋንጌላ ኡዲሼ፡ ሂንቴና ዋይሶና ሜላ ቃማኔ ጋላስ ኡሲዳ።

10 ኑ ዴዎይ ሂንቴ አማኔይሳታ ማታኒኔ ያሳ ሲንላን ጌሺ፡ ዓላኔ ቦሬቶናይሳ ገዴይሳስ ሂንቴ ማርካ። 11 ኑሂ ሂንቴው ሁዔን ሁዔን ዬሊዳይሳቲ ባንታ ናይታስ ሃኔይሳዳ ሃኒዳይሳ ኤሬታ። 12 ኑ ሂንቴና ዞሪዳ፡ ሚንጮሲዳ። ቃሲ ባ ካዋቴላኔ ባ ቦንቹዋ ሻካናው ሂንቴና ያገይ ያሳ ኡፋይሲያ ዴዎ ሂንቴ ዳና ሜላ ሂንቴው ሚንጮሲዳ ኡዲዳ።

13 ሂንቴው ኑሂ ያሳ ቃላ ኡዲዳ ዋዴ አሳ ቃላዳ ገደናሺን ያሳ ቃላዳ ሲዲዲ ኤኪዳ ገሾ ኑሂ ኡባ ዋዴ ያሳ ጋላቶስ። ኢ ቱማ ያሳ ቃላ፤ ያሳ ቃላይ አማኒያ ሂንቴናን ኡሴስ።

14 ታ አሻቶ፡ ሂንቴ ዪሁዳ ቢታን ዴዲያ ዋሳ ኬላታኔ ያን ኪሪሰቶስ ዬሱሳ ካሊያ አሳታዳ ሃኒዴታ። ኤንታ አይሁዴቲ ዋይሲዳይሳዳ ሂንቴናካ ሂንቴ ቢታ አሳይ ዋይሲደሶና። 15 ሄ አይሁዴቲ ጎዳ ዬሱሳኔ ናቤታ ዋዴደሶና፤ ቃሲ ኑና ጎዲደሶና። ኤንቲ ያሳ ኡፋይሶናይሳታኔ አሴ ኡባ ኢጄይሳታ። 16 ኤንቲ ሃሪ አቶሺን፡ አይሁዴ ገደና አሳይ አታና ሜላ ኑሂ ኤንታው ቃላ ኡዴይሳ ዲጎሶና። ሄሳዳ ሃኒዲ ኤንታ ናጋራ ፀዓይ ኩማና ጋካናው ኡባ ዋዴ ናጋራ ኡሶሶና። ዉርሴላን፡ ያሳ ሃንቆይ ኤንታ ቦላ ዋዴስ።

ጳውሎሲ ቴሴሎንቄ አሳ ዛሪ ቤዓናው አሞቲስ

17 ሺን ኑ አሻቶ፡ ኑሂ ኑ ቆፋን ገደናሺን አሾን ሂንቴፌ ሻኬቲዲ ጉላ ዋዴ ጋሞዲዳይሳን ሂንቴና ዳር ላሞቲዲ ቤዓናው ኮዪዳ። 18 ኑ ሲሚ ሂንቴኮ ባናው ኮዪዳ። ታኒ ታ ሁዔን ሂንቴኮ ባናው ኮያስ፡ ሺን ዓላሃይ ኑና ዲገሰ። 19 ሃዛ፡ ኑ ጎዳ ዬሱስ ኪሪሰቶሲ ያ ዋዴ ኑ ኡፋይሳይ ዋይኮ ኑ ጨቁቲያ ኑ ካላቻይ ኦኔ? ሂንቴና ገዴኬቲዬ? 20 ቱማ ሂንቴ ኑ ቦንቹኔ ኑ ኡፋይሲ።

2:14 ሃ.ኦ 17:5 2:15 ሃ.ኦ 9:23፣ 29፤ 13:45፣ 50፤ 14:2፣ 5፣ 19፤ 17:5፣ 13፤ 18:12

3

1 ሃሳ ጊሾ፣ ኑስ ገንጫናው ዳንዳዔቶና ኢዲን፣ አቴና ካታማን ኑርካ አታናው ቆፋ ቃቸዳ። 2 ሂንቴና ዘራናዳኔ አማኖን ሂንቴና ሚንጭላናዳ ኑራ ኢሲፌ ያሳሰ ኦጭይሳኔ ኪሪሰቶሳ ዋንጌላ ኦዲያ ኑ አሻ ዲሞቲዮሳ ሂንቴኮ ኪቲዳ። 3 ሂንቴና ጋኪዳ ጎዳን ሂንቴፌ ኦኒካ ጉዬ ሲሞሮ። ሄ ጎዳይ ኑስ ያሳ ሸኔ ጊዳይሳ ሂንቴ፣ ሂንቴ ሁዔን ኤሬታ። 4 ኑ ሂንቴራ ዳዒያ ዋዴ ጎዳ ጋካናይሳ ሂንቴው ኮይሮቲዲ ኦዲዳ። ሂንቴ ኤሬይሳ ማላ ሃሳዳ ሃኒሰ። 5 ሃሳ ጊሾ፣ ታው ገንጫናው ዳንዳዔቶና ኢዲን፣ «ኦኒ ኤሪ ዓላሃይ ኤንታ ፓጩዲ ኑ ዳቡራ ማላ አሾና አጌና» ጋዳ ሂንቴ አማኑዋባ ኤራናው ዲሞቲዮሳ ሂንቴኮ ኪታሰ።

6 ሃዒ ዲሞቲዮሲ ሂንቴ ማታፔ ዪዲ፣ ሂንቴ አማኑዋባኔ ሂንቴ ሰቁዋባ ሎዎ ዋሬ ኦዲሰ። ቃሲ ሂንቴ ኡባ ዋዴ ኑስ ሎዎ ቆፔይሳኔ ኑኒ ሂንቴና ቤዓናው ላሞቴይሳዳ ሂንቴካ ኑና ቤዓናው ላሞቴይሳ ኢ ኑስ ኦዲሰ። 7 ታ አሻቶ፣ ኑና ጋኪያ ዋያኒኔ ኑ ሜቶ ኡባን ሂንቴ አማኑዋ ጊሾ ሂንቴናን ሚኔቲዳ። 8 ሂንቴ ጎዳን ሚኒዲ ዳዒኮ ኑካ ዳዎን ዳዎሰ። 9 ሂዛ፣ ኑኒ ሂንቴ ጋሶን ዳሚዳ ኡፋይሳሰ ያሳ ዋቲ ጋሳቲኖ? 10 ኑኒ ሂንቴና ቤዓናውኔ ሂንቴ አማኑዋን ፓጩዳባ ኩንላናው ቃማኔ ጋላሰ ኑ ኩሜላ ዋዛን ያሳ ዋሶሰ።

11 ያሳይ ኑ አዋይ ባ ሁዔኒኔ ኑ ጎዳይ ዬሱሰ ኪሪሰቶሲ ኑ ሂንቴኮ ባና ኦጊያ ገጊሶ። 12 ኑ ሂንቴና ዳሮ ደሴይሳዳ ጎዳይ ሂንቴ ኢሶይ ኢሱዋ ሰቂያ ሰቆኔ አሴ ኡባ ሰቂያ ሰቆ ሂንቴው ዳርሶኔ ጉጅ። 13 ኑ ጎዳይ ዬሱሰ ኪሪሰቶሲ ባ ጌሻታራ ያ ዋዴ ያሳ፣ ኑ አዋ ሰንላን ሂንቴ ዋዛናይ ጌሺኔ ቦሬይ ባይናይሳ ኦጭዲ ኢ ሂንቴና ሚንጭላና።

4

ያሳ ኡፋይሲያ ዳዎ

1 ወርሴላን፣ ታ አሻቶ፣ ያሳ ኡፋይሳናው ሂንቴ ዋኒዲ ዳናው ቤሲያኮ ኑፔ ታማሪዴታ። ሄሲ ሂንቴ ኮይሮፔ ዳዒዳ ዳዐው፣ ሺን ሃዒ ሂንቴ ካሴይሳፌ አሉዲ ኦላናዳ ጎዳ ዬሱሳ ሱንላን ሂንቴና ዋሶሲኔ ዘርሰ። 2 ኑኒ ጎዳ ዬሱሳ ማታን ሂንቴና ኪቲዳ ኪታይ አዉሴኮ ኤሬታ።

3 ያሳይ፣ ሂንቴ ጌሺ ጊዳና ማላኔ ላይማቶና ማላ ኮዬሰ። 4 ሂንቴ ኢሶይ ኢሶይ፣ ሂንቴ ማቸታራ ጌሻቲላኒኔ ቦንቸን ዳናው

3:1 ሃ.አ 17:15 3:6 ሃ.አ 18:5

ቤሴስ። 5 ያሳ ኤሮና ኣማኖና ኣሳዳ ላይማቴላ ኣሞን ፀጌቶፊቴ። 6 ኑ ካሴ ሂንቴው ኦዲዲይሳዳኔ ሚንሱ ዘሪዲይሳዳ ጎዳይ ሄሳ ማለባ ኦሊያ ኡባ ፐርዲያ ጊሾ ኦኒካ ሃይሳታን ባ ኣማኒያ ኢሻ ናቓናውኔ ጨማናው ቤሴና። 7 ያሳይ ኦኒ ጌሽቴላን ዳና ማለፔ ኣቲን ቱናቴላን ዳና ማላ ፃጊቤና። 8 ሄሳ ጊሾ፡ ሃ ቲሚርቲያ ኢዲያ ኦኒካ ሂንቴው ጌሻ ኣያና ኢሚያ ያሳ ኢፃሰፔ ኣቲን ኣሴ ጊዳና።

9 ሂንቴ ኢሶይ ኢሱዋ ዋቲ ሲቃኔኮ ያሳይ ሂንቴና ታማርሲዳ ጊሾ ሃዒ ሲቆባ ኑ ሀንቴው ፃፋናው ኮሼና። 10 ቃሲ ማቄዶኒያ ቢታን ዳዒያ ኣማኒያ ኢሻታ ኡባ ቱማ ሂንቴ ደሴታ። ሺን ኑ ኢሻቶ፡ ሃዒካ ሂንቴ ኤንታ ኣሉ ደሳና ማላ ሂንቴና ዋሶስ።

11 ኦኒ ካሴ ሂንቴው ኦዲዲይሳዳ ዋፑ ጊዳ ዳዑዋ ዳዒቴ። ሂንቴ፡ ሂንቴ ኦሶ ኦሊዲ ሂንቴው ዲሳስ ኮሺያባ ዳሚቴ። 12 ሄሳዳ ሃኒኮ፡ ኣማኖናይሳታ ማታን ሂንቴ ቦንቼታና፤ ቃሲ ሂንቴና ኮሺያባሰ ኦናካ ኣዳሼኬታ።

ጎዳ ዩሳባ

13 ኑ ኢሻቶ፡ ኣማኒዲ ሃይቂዳ ኣሳቲ ሃናናባ ሂንቴ ኤራና ማላ ኮኖስ። ሂንቴ ኤንታ ጊሾ ኡፋይሲ ባይና ኣሳዳ ካኖቶፊቴ። 14 ኦኒ፡ ዬሱሲ ሃይቂዳይሳኔ ቃሲ ሃይቆፔ ዴንዲዲይሳ ኣማኖስ። ሄሳዳካ፡ ያሳይ ዬሱሳ ኣማኒዲ ሃይቂዳይሳታ ኢያራ ዋላ ኤሃናይሳ ኣማኖስ።

15 ጎዳይ ኦስ ኦዲዲይሳዳ ጎዳይ ያ ጋላስ ኢያራ ጋሄታናው ኦኒ ጋፃ ዳዒይሳቲ፡ ሃይቂዳይሳታፔ ሲንላቶኮ። 16 ጎዳይ ዋልቃማ ኪታራ፡ ኪታንቾታ ሃላቃ ጊርሳራ፡ ያሳ ሞይዜ ፑናራ፡ ሳሎፔ ዋቆና። ኪሪሰቶሳ ኣማኒዲ ሃይቂዳይሳቲ ኮይርቲዲ ሃይቆፔ ዴንዳና። 17 ሄሳፌ ጉዬ፡ ሄ ዋዴ ኦኒ ጋፃ ዳዒይሳቲ፡ ጎዳራ ሻራን ጋሄታናው ኤንታራ ኢሲፌ ሳሎ ኤኬታና። ሄሳፌ ጉዬ፡ ኦኒ ጎዳራ ኢሲፌ ማሪናው ዳና። 18 ሄሳ ጊሾ፡ ሃ ቃላን ኢሶይ ኢሱዋ ሚንሱፊቴ።

5

ጎዳ ዩሳ ጊጊዲ ናጊቴ

1 ታ ኢሻቶ፡ ሃ ሃኖቲ ሃናና ዋዲያኔ ኣጌና ሂንቴው ፃፋናው ኮሼና። 2 ጎዳ ጋላሳይ ካይሶይ ቃማ ዬይሳዳ ያናይሳ ሂንቴ ሎይሉ

4:15 1ቆር 15:51-52

ኤሬታ። 3 አሳይ፥ «ሳጺ ሳር፥ አይኮይካ ሃኔና» ያገሸን፥ ማጫሰ አቁሏ ኦይኬይሳዳ ጳዮይ ኤንቲ ቆፖና ኤንታ ቦላ ያና። ኤንቲ አይ ኦጌንካ ከሴ ኤኮኮና።

4 ሺን ኑ አሻቶ፥ ሄ ጋላሳይ ሂንቲው ካይሶይ ዩይሳዳ ያናው ሂንቲ ቆማን ዴኤኬታ። 5 ሂንቲ ኡባይ ፖዖ አሲኔ ጋላሳን ዴዲያ አሲ፤ ኑኒ ቃማ አሲ ዋይኮ ቆማ አሲ ገደኮ። 6 ሄሳ ገሾ፥ ኑኒ ሃራቲ ጲሰኬይሳዳ ጲሰካናው ቤሴና፤ ኑኒ ባርካንዉኔ ገጊዲ ዳናው ቤሴሰ። 7 ጲሰኬይሳቲ ቃማ ጲሰኮሶና፤ ማላቲይሳቲ ቃማ ማላቶሶና። 8 ሺን ኑኒ ጋላሳ አሲ ገዲያ ገሾ ገገዲ ዳናው ቤሴሰ። አማኖኔ ሲቆ ፀሩሬዳ ቲራን ማዲዲ፥ አቶቴላ ኡፋይሳ ሁዔን ዋሊያ ኦላ ቢራታ ባርኔፃዳ ዋሊዲ ዳናው ቤሴሰ። 9 ያሳይ ኑና ኑ ጎዳ ዩሱሰ ኪሪሰቶሳ ባጋራ ኩሜላ አቶቴላ ኤካና ሜላ ደሪሰፔ አቲን ሃንቆሰ ደሪቤና። 10 ኑኒ ፓፃ ዴዲን ዋይኮ ሃይቁን፥ ኪሪሰቶሲ ያ ዋዴ ኢያራ ኢሲፌ ዳና ሜላ ኪሪሰቶሲ ኑ ገሾ ሃይቁሰ። 11 ሄሳ ገሾ፥ ሂንቲ ካሴ ኦሌይሳዳ፥ ኢሶይ ኢሱዋ ሚንሌሊቲኔ ዲቺቲ።

ወርሴላ ዞሬኔ ሳርታ

12 ኑ አሻቶ፥ ሂንቲ ገደን ኦሌይሳታ፥ ሂንቲና ካሌላና ሜላኔ ዞራና ሜላ ጎዳይ ደሪዳይሳታ ቦንቻና ሜላ ሂንቲና ዋሶሰ። 13 ኤንቲ ኦሊያ ኦሱዋ ገሾ ኤንታ ዳር ቦንቺቲኔ ሲቁቲ። ኢሶይ ኢሱዋራ ሳርቲላን ዴዲቲ።

14 ኑ አሻቶ፥ ኑኒ ሂንቲና ዞርሰ። ቦዛታ ሃንቁቲ፤ ባቤይሳታ ሚንሌሊቲ፤ ዳቡራንቾታ ማዲቲ፤ አሴ ኡባ ዳንዳዲቲ። 15 ኦኒካ ኢታ ገሾ ኢታ ዛርና ሜላ ናጌቲቲ። ሂንቲ ዋሊሲኔ አሳ ኡባሰ ሎዖባ ኦላናው ሚኒቲ።

16 ኡባ ዋዴ ኡፋይቲቲ። 17 ኡባ ዋዴ ያሳ ዋሲቲ። 18 ኡባባን ጋላቲቲ። ኪሪሰቶሰ ዩሱሳ ባጋራ ያሳይ ሂንቲፌ ኮዬይ ሄሳ።

19 ጌሻ ኢያና ኦሱዋ ቶይሶፒቲ። 20 ቲንቢቲ ቃላ ካጶፒቲ። 21 ኡባባ ፓጩቲ፤ ሎዖባ ኤኪቲ። 22 ኢታ ኦሶ ኡባፌ ሃኪቲ።

23 ሳር ኢሚያ ያሳይ ባ ሁዔን ሂንቲና ፖሎ ጌሾ። ኑ ጎዳይ ዩሱሰ ኪሪሰቶሲ ያና ጋላሳሰ፥ ያሳይ ሂንቲ ኢያና፥ ሂንቲ ሸምፑዋኔ ሂንቲ ኩሜላ አሳቴላ ቦሬይ ባይና ናጎ። 24 ሂንቲና ፃጌይሲ አማኔቲዳይሳ ገዲያ ገሾ ሄሳ ኢ ፖላና።

25 ኑ አሻቶ፥ ኑሰ ያሳ ዋሲቲ።

26 አማኒያ አሳ ኡባ ጌሻ ዩሬቲላን ሳርሊቲ።

27 ሂንቴ ሃ ኪታ አማኒያ አሳ ኡባሰ ናባባናዳ ጎዳ ሱንጻን ሂንቴና ዎሳይሰ።

28 ኑ ጎዳ ዩሱሰ ኪሪሰቶሳ አጼ ኬሃቴላይ ሂንቴራ ኢሲፊ ጊድ። አሚንዒ።

ኦራሳ ጩቂዋ ጎፋላ
New Testament in Gofa

copyright © 2011 Wycliffe Bible Translators, Inc.

Language: Gofa

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gofa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 21 Feb 2024 from source
files dated 29 Jan 2022
c35d6c73-3843-5482-b53e-7559d35deee5